

Nda cati seɗɗa nder yimre nde– Bashiiru Abuubakar yusbi wi’eteende:

WOYRUDE HASSĀNU RĀJI

1. Mi fudɗiri bismillaahi hooti mi yettoyi,
Fa Khaliku tagɗo tageefo fū ina hoynoyi,
Be yeedoya hooti be maaya wa’adu to yottoyi,
E dow kala kō moye balde mum fa to timmoyi,
Fa dōle yo nooto Yā Mumiitu fa dillina.
2. Mi silminoyii dow Annabiijo he aalo’en,
Sahaabo be maako mi hawti bee Taabi’iina en,
E Mōdiɓbe tokkuɓe sunna Annabi kooho men,
E luttube julbe be faatinaa ma e yedɓe men,
Mi yelnani faatuɓe hinnaye be’e bo muna.
3. Si ɓaawo ɗu’um ko nufiimi yimgo he yimre nde,
Fa heɗta nanaa yo mi kabra mā ko woni e nde,
E nde bernde war nana nam e woodi ko hubɓi nde,
Mi ɗabbitoɓan ko mi hilloro ha mi fewna nde,
Fa Allah Ceniɗo yedam ko muymi mi yottina.
4. Nufaare nde am yusɓoyki yimre mi fewnira,
Fa bernde nde am waywoyta Mallu nde senndira,
Mi muuyi mi yusɓoya yimre foofo mi hofnira,
Fa saaro iyaalu e ɓiɓbe maako e derɗiraa,
Lenyol Rāji fū hofnaama nanɗo fu nannina.
5. Lenyol Rāji jasngol moy nde woyri heɗā nana,
Mo Alkāli Bāmanga Rāji Hassānu inna na,
Lenyol Rāji nyamre e nanre fū higo djam nana,
Fa Modibbe Alfa Mu’azu Usmānu djam nana,
Fa yaa Allah Mawɗo Ceniɗo yerdube barkina